

REKENINGS ONTVANGBAAR AFDELING

OMSKREWE GEBEURTENISSE

Verlies as gevolg daarvan dat die Versekerde nie in staat is om die uitstaande debietsaldo's wat ten volle of gedeeltelik aan hom verskuldig is, op te spoor of vas te stel nie opvolgend tot verlies of skade weens 'n ongeval of teëspoed (hierna Skade genoem) aan die Versekerde se rekeningboeke of ander besigheidsboeke of -rekords terwyl by:

1. die gebou(e) op die Versekerde se perseel soos vermeld in die bylae; of
2. die woning van enige direkteur, vennoot of werknemer van die Versekerde; of
3. die perseel van enige rekenmeester van die Versekerde; of
4. enige ander plek van veiligheid indien, weens 'n dreigende gevaar van hulle vernietiging, sodanige rekeningboeke of ander besigheidsboeke of -rekords van die perseel soos hierbo vermeld, verwyder word (insluitende sodanige nood verwydering of terwyl dit na die perseel soos hierbo aangedui, agterna teruggebring word)

op voorwaarde dat:

1. die Versekerde die Maatskappy binne 30 dae na enige verwydering soos in 4 hierbo uiteengesit, skriftelik in kennis sal stel;
2. die aanspreeklikheid van die Maatskappy hoogstens die versekerde bedrag beloop wat in die bylae vermeld word; en
3. die skadeloosstellingsgrondslag sal wees soos uiteengesit in die Klousule: "Skikkingsgrondslag".

Die Maatskappy betaal ook alle redelike invorderingskoste en -uitgawes wat deur die Versekerde aangegaan word en wat die gewone invorderingskoste en -uitgawes oorskry wat deur sodanige Skade genoodsaak word.

OMSKRYWINGS

Uitstaande Debietsaldo's: Sal beteken die totaal wat verklaar word in die laaste verklaring wat ingevolge die bepaling van die Klousule: "Verklarings" gegee en aangepas is vir:

1. slegte skulde;
2. bedrae gedebiteer (of gefaktureer maar nie gedebiteer nie) en gekrediteer (insluitende kredietnotas en kontant wat nie tentyde van die Skade in die boeke opgeneem is nie) teen kliënte se rekeninge in die tydperk tussen die datum van die vermelde laaste verklaring en die datum van die Skade en
3. enige abnormale handelstoestand wat 'n weselike invloed op die besigheid gehad het of kon gehad het;

sodat die aangepaste bedrag aldus verkry so na as wat redelikerwys uitvoerbaar is, die bedrag verteenwoordig wat, as dit nie vir die Skade was nie, verkry sou gewees het op die datum van die Skade.

SPEKIFIEKE UITSLUITINGS

Die Maatskappy sal nie betaal nie vir:

1. verlies wat voortspruit uit Skade aan die rekeningboeke of ander besigheidsboeke of -rekords wat veroorsaak word deur:
 - 1.1 slytasie of geleidelike agteruitgang of motte of ongedierte;
 - 1.2 detensie, beslaglegging of konfiskering deur enige wettig ingestelde owerheid;

- 1.3 elektriese, elektroniese of magnetiese beskadiging, steuring van of uitwissing, tensy die Versekerde duplikaatrekords in stand hou waarna in die Duplikaatrekordsvoorwaarde in hierdie afdeling verwys word.
2. verlies veroorsaak deur bedrog of oneerlikheid van enige prinsipaal, direkteur, vennoot of werknemer van die Versekerde.

KLOUSULES EN UITBREIDINGS

Andersins onderhewig aan die terme, uitsluitings en voorwaardes van hierdie afdeling en die Algemene afdeling (waarvan alles geldig en toepaslik bly, tensy spesifiek hieronder geskrap of verander), word die dekking ingevolge hierdie afdeling verander of uitgebrei soos hieronder uiteengesit onder elke uitbreiding en klousule (maar waar van toepassing soos hieronder aangedui, slegs indien sodanige uitbreidings en klousules as ingesluit in die bylae vermeld word) onderhewig aan enige versekerde bedrae of eerste bedrae betaalbaar soos vermeld in die bylae onder elke uitbreiding.

Rekenmeesters

Enige gegewens of besonderhede wat in die Versekerde se rekeningboeke of ander besigheidsboeke of -rekords vervat word en wat deur die Maatskappy benodig mag word ingevolge hierdie afdeling om enige eis hierkragtens te ondersoek of te staaf, mag deur die Versekerde se ouditeure of professionele rekenmeesters gelewer en gesertifiseer word en hulle sertifikaat is prima facie-bewys van die gegewens en besonderhede waarop sodanige sertifikaat betrekking het.

Skikkingsgrondslag

Die versekering ingevolge hierdie afdeling word beperk tot die verlies wat deur die Versekerde gely word ten opsigte van uitstaande debietsaldo's wat regstreeks te wyte is aan die Skade, en die bedrag wat betaalbaar is, beloop hoogstens:

die verskil tussen **die uitstaande debietsaldo's** en **die totaal van die bedrae ontvang of nagespoor ten opsigte daarvan** plus

die bykomende uitgawes aangegaan om kliënte se debietsaldo's na te spoor en vas te stel ná die Skade op voorwaarde dat,

1. die maksimum aanspreeklikheid van die Maatskappy sal hoogstens die versekerde bedrag beloop ongeag die bedrag vervat in enige verklarings wat gemaak is soos uiteengesit in punt 3 van die klousule: Verklarings;
2. indien die versekerde bedrag ingevolge hierdie item minder is as die uitstaande debietsaldo's, die bedrag betaalbaar na verhouding verminder sal word.

Verklarings (indien in die bylae as van toepassing vermeld deur die woord "Ja" teenoor "Verklaringsvoorwaarde")

Die Versekerde moet die versekerde bedrag op 'n vlak vasstel wat die maksimum verwagte Uitstaande debietsaldo's op enige gegewe tydstip gedurende die versekeringstydperk verteenwoordig. Die verantwoordelikheid sal gedurende die versekeringstydperk by die Versekerde bly om die Maatskappy skriftelik in kennis te stel sou 'n verhoging in die versekerde bedrag vereis word weens Uitstaande debietsaldo's wat die versekerde bedrag oorskry. Verklarings ontvang soos hieronder uiteengesit wat die versekerde bedrag oorskry, sal nie geag word 'n formele versoek te wees om die versekerde bedrag te verhoog nie.

Die Versekerde sal met tussenposes soos in die bylae teenoor "verklaringsgrondslag" uiteengesit, die Maatskappy voorsien van 'n ondertekende verklaring waarin aangetoon word die totale bedrag wat uitstaande is in kliënte se rekeninge soos uiteengesit in die Versekerde se rekeninge op daardie tydstip.

As teenprestasie daarvoor dat die premie ingevolge hierdie afdeling voorlopig is omrede 'n depositopremie gehef word, gebaseer op 'n persentasie (soos in die bylae teenoor "depositopremie %" aangedui) van die vereiste premie, word die premie soos volg aangepas:

By die verstryking van elke versekeringstydperk (of na twaalf agtereenvolgende maande vanaf die intreedatum of hernuwingsdatum indien hierdie polismaandeliks per debietorder betaal word), word die werklike premie vir die verstreke tydperk herbereken gebaseer op die gemiddelde bedrag van die verklarings wat ontvang is en 'n premie-aanpassing word

gemaak, op voorwaarde dat:

1. sodanige herberekening uitgevoer sal word sonder dat die depositopremie-persentasie op sodanige gemiddelde bedrag toegepas is;
2. vir die doeleindes van die berekening van die gemiddelde bedrag, sal enige bedrag verklaar wat meer is as die versekerde bedrag, beperk wees tot die versekerde bedrag en premie sal nie betaalbaar wees nie op daardie gedeelte van enige verklaring wat meer is as die versekerde bedrag;
3. die Maatskappy in die geval van 'n verlies, ongeag die waarde van enige verklarings wat ontvang is, nie aanspreeklik sal wees nie vir meer as die versekerde bedrag soos aangedui in die bylae;
4. indien die werklike premie meer is as die voorlopige premie, die Versekerde die verskil aan die Maatskappy moet betaal en indien dit minder is, word die verskil aan die Versekerde terugbetaal, maar sodanige terugbetaling beloop hoogstens 33,3% van die voorlopige premie wat betaal is.

Oproer en staking (behalwe RSA en Namibië) (indien in die bylae as ingesluit vermeld)

Hierdie afdeling word uitgebrei om verlies of Skade te dek wat regstreeks veroorsaak is deur of deur middel van of as gevolg van:

1. burgerlike onrus, arbeidsonluste, oproer, staking of uitsluiting;
2. die optrede van enige wettig ingestelde owerheid by die beheer, voorkoming of onderdrukking van, of terwyl daar op enige ander wyse gehandel word met, enige gebeurtenis waarna in 1 hierbo verwys word.

Met dien verstande dat hierdie uitbreiding nie die volgende dek nie:

1. verlies of Skade wat binne die Republiek van Suid-Afrika en Namibië plaasvind;
2. gevolglike of onregstreekse verlies of Skade van enige aard of beskrywing hoegenaamd;
3. verlies of Skade wat spruit uit die algehele of gedeeltelike staking van werk of die vertraging of onderbreking of staking van enige proses of werksaamheid;
4. verlies of Skade wat veroorsaak word deur permanente of tydelike besitontneming wat spruit uit die konfiskering, kommandering of rekwisisie deur enige wettig ingestelde owerheid;
5. verlies of Skade wat verband hou met of veroorsaak word deur enige gebeurtenis waarna daar in Algemene uitsluiting 1 (A) (ii), (iii), (iv), (v) of (vi) van hierdie polis verwys word of enige optrede van enige wettig ingestelde owerheid by die beheer, voorkoming of onderdrukking van, of terwyl daar op enige ander wyse gehandel word met, sodanige gebeurtenis.

Indien die Maatskappy uit hoofde van voorbehoudsbepalings 1, 2, 3, 4 of 5 beweer dat hierdie uitbreiding nie verlies of Skade dek nie, rus die las op die Versekerde om die teendeel te bewys.

Transito (indien in die bylae as ingesluit vermeld)

Die versekering ingevolge hierdie afdeling sluit in verlies, soos omskryf, aan die Versekerde se rekeningboeke of ander besigheidsboeke of -rekordsterwyl dit vervoer word na of van die perseel of woning van enige direkteur, vennoot, werknemer of rekenmeester van die Versekerde.

VOORWAARDES

Duplikaatrekords (indien in die bylae as toepaslik vermeld)

Die Versekerde moet duplikate in stand hou van sy rekeningboeke of ander besigheidsboeke of -rekords waarin besonderhede van uitstaande saldo's vervat word en sodanige duplikate moet by ander persele as die oorspronklikes daarvan geberg word.

Beskerming (Brandvaste kluis) (indien in die bylae as toepaslik vermeld)

Die Versekerde se rekeningboeke of ander besigheidsboeke of -rekords wat besonderhede van uitstaande saldo's bevat, moet buitensake-ure in 'n brandvaste brandkas, kabinet of brandkluis gehou word, tensy daar aan hulle gewerk word of hulle vir onmiddellike verwysing benodig word.